

## INTERVISTA CUN OLIVER NYFFELER – IL NOV PRESIDENT DA LA GIURU

dad Ursin Lutz

**A CHASCHUN DA LA RADUNANZA GENERALA DA LA GIURU CHE HA GI' LIEU IL SCHAENER 2007 A BRAVUOGN È OLIVER NYFFELER VEGNÌ ELEGÌ SCO NOV PRESIDENT DA LA GIURU. PUNTS HA DISCURRÌ CUN EL DAVART SES PLANS E SIA PERSUNA.**

**Uei Olli, gratulaziun per tes nov post. Ti es uss pli u main il pli impurtant giuven en la Rumantschia. Tge sentiment è quai?**

Grazia, uschia n'hai jau anc betg vis quai. Ma i fa en mintga cas impressiun dad udir talas chaussas, tut en tut in fitg bun sentiment.

**Co sa mida la GiuRu cun tai sco president?**

Quai na dependa betg mo da mai. La nova suprastanza decida tge che mida e tge betg. Ma la direcziun ed il svilup dals ultims onns constattan, prubar da far memia bleras midadas en la situaziun actuala fiss fallà.

**Tge acziuns èn gia planisadas per quest onn?**

Planisads en in u l'auter workshop, festas, activitads cun autras minoritads, participaziun al SUFO (Sozial- und Umweltforum; remartga da la red.), in project per l'Open Air Lumnezia, forsa in teater ed anc bler auter...

**La GiuRu ha vaira blers commembers, però be paucs che s'engaschan. Tge quintas ti da far cunter quest problem?**

Quai è in da quels problems che nus discutain adina puspè, e la soluziun es vairamain simpla. Persvader noss commembers che engaschament per la GiuRu n'è betg in stuair, ma anzi in'activitad che fa plaschair, che fa senn e che serva a mintgin che sa participescha. Tgi che nun ha mai provà manchenta insatge.

**In intent central da la GiuRu è da colliar la giuventetgna rumantscha da las differentas regiuns. Cuntenta la situaziun actuala?**

Na. I dat uniuns da giuventetgna che realiseschan quants avantatgs ch'ina collavuraziun surregionala ha, memia bleras però na pensan betg sur il cunfin da lur agen vitg ora.

**Uss anc in zichel tar tai sco persuna privata. Ti es naschì a Turitg e tes num na tuna era betg fitg rumantsch. Pertge es ti tuttina in vair Rumantsch?**

In vair Rumantsch na sa mussa betg tras sia



**La nova suprastanza da la GiuRu (da sen. a dretg): Martin Cantieni, Annatina Nay, Anna Rauch, Gion-Andri Cantieni ed Oliver Nyffeler.**

derivanza u tras ses num. In dretg Rumantsch sa mussa plitost tras si'identificaziun cun la lingua e cun la cultura, e quella è tar mai gronda avunda per ma numnar «in vair Rumantsch». Forsa è il fatg ch'in «Unterländer» s'engascha per il rumantsch perfin ina motivaziun per auters giuvens.

**Sin la pagina d'internet da la GiuRu (www.giuru.ch) vuls ti tradir nagut u be pauc da tia vita privata. Tge datas e cifras tradeschas als lecturs da PUNTS?**

Mia grondezza da chalzers: 43. Basta quai? OK, in pau dapli: Oliver, 21 onns, student, da chasa en ina WG a Winti (il caos pur), baiva biera, legia PUNTS...

**Sin www.giuru.ch san ins era leger il suandant sur da tai:**

«Bainbaud less jau ir en viadi tschintg u sis mais (sche pussaivel tut il mund). Suentar quai dun jau si mia lavur tar la banca, vegn ad emprender il saut da step e vegn sin turnea cun «Riverdance». Suentar quai cumprel ina pitschna ustaria a Cuira e'm lasch pensunar (cun 31 onns). Per dapli infurmaziuns am pos telefonar u scriver ina carta (giuvinas tranter 18 e 23 vegnan preferidas).»

**Il viadi enturn il mund has ti realisà dacurt. Tge novas experientschas has pudì rimnar? Pos forsa quintar in'interessanta anecdota da tes viadi? Es turnà gudent?**

Jau stoss dir ch'jau hai passentà durant quels tschintg mais en viadi in incredibel bun temp. Anecdotas datti tantas ch'jau na savess gnanc nua cumenzar a quintar. Tras in tal viadi vegn ins automaticamain pli avert, ins vesa bler or

d'ina outra perspectiva, pli flexibel, pli spontan.

Insatge dal pli impressiunant è franc la gliued ch'ins emprenda d'enconuscher – per part naschan contacts che vegnan a restar anc per onns.

Turnar era extrem grev. Jau sun arrivà a Turitg e m'hai ditg: «OK, bel qua, ma quai conusch jau già, jau vom puspè!»

**Valan tes ulteriurs plans anc?**

Saut da step, ustaria a Cuira e la pensiun cun 31 onns ... Ils plans sun anc pli u main ils medems. Jau ma sun però decis da studegiar anc per trais onns, per avair in bun fundament...

**E co statti cun las giuvinas?**

S'annunzian bleras giuvinas tar tai per dumandar dapli infurmaziuns? Brevs, mails, faxes, telefons ... Jau na tegn gnanc pli pass a dar resposta...

**Tia filosofia da vita?**

I vegn bun...

**Per finir anc tschintg chavazins. Tge ta vegn endament spontan tar quests?**

- **GKB** - Passà

- **ukulele** - Suentar tschintg mais exercitar sai jau dus accords

- **Chatrina** - mia presidenta preferida

- **Ahoi Brause** - mal il chau

- **nettegiar chalzers** - sto esser mintgatant